



Exelénsia
Senhor Prezidente Parlamentu Nasionál
Exelénsias
Vise-Prezidente sira Parlamentu Nasionál nian

Exelénsias
Senhora no Senhor Deputadu sira

Kolega sira
Senhora no Senhor membru Governu sira
Senhora no Senhor, Distintu Konvidadu sira

Ho ksolok boot no espíritu husi devér ne'ebé kumpre ona maka ohin ita taka debate ne'e ho Votasaun Finál Globál, kona-ba Orsamentu Jerál Estadu nian ba Tinan Fiskál 2019 nian.

Uluk nanain, lori Governu Konstitusionál VIII nia naran no ha'u nia naran rasik, ha'u hato'o agradesimentu ba Distintu Deputadu sira hotu, ba ita boot sira nia espíritu abnegasaun no sakrifísiu nian, bainhira simu dezafiu atu husik hela ita boot sira nia períodu normál pauza nian ba resesu parlamentár iha tempu Natál nian, atu bele hatán ba promesa ne'ebé halo ona ba Povu no ba País, atu aprova, iha tempu ne'ebé adekua, Orsamentu Jerál Estadu tinan 2019 nian, ne'ebé ita iha hakarak tebes atu hala'o funsionamentu Estadu nian no ba impulsionamentu ne'ebé dí'ak ba ita nia ekonomia iha tinan oin mai.

Hafoin negosiasaun ne'ebé susar iha laron 13 (sanulu resin tolu) nia laran atu debate iha jeneralidade no spesialidade proposta oi-oin husi Governu no preokupasaun sira husi Partidu oi-oin ne'ebé iha asentu parlamentár, ha'u fiar katak ita hotu merese parabéns ba rezultadu sira ne'ebé ita alkansa ona, ne'ebé hadi'a duni versaun orijinál, hodi halo versaun ne'e sai konsensuál no sensível liu tán ba espetativa lejítima sira husi ita nia comunidade no populasaun.

Medida sira ne'ebé maka ita nia opiniaun publika akompaña no debate mós ho detalhe, hodi promove Sidania ida ne'ebé maka ita hakarak atu ativa no partisipativa liu tán, liu husi órgaun komunikasaun sosiál nian sira no organizasaun oi-oin ne'ebé halo parte ba ita nia sociedade sivil ne'ebé dinámiku.

Orsamentu ida, ne'ebé tuir ami nia haree, kumpre objetivu boot tolu hanesan ha'u temi tiha ona iha ha'u nia diskursu apresentasaun nian, iha laron 6 fulan dezembru liu bá, liu-liu:

- **Orsamentu ida ba mudansa** – tanba aposta liu ba papél ne'ebé ativu liu tán husi Estadu no husi País iha desenvolvimentu ba ita nia rekursu naturál sira, ho sosa asaun ConoccoPhillips no Shell Austrália ninian;
- **Orsamentu ida atu fila fali ba Normalidade Loloos** – ho continuidade husi investimentu sira iha infraestrutura no servisu báziku sira konaba edukasaun, saúde, abitasaun, konetividade,

asesu ba eletrisidade, bee ka saneamentu, investimentu hirak ne'ebé esensiál atu rekupera nivel kreximentu nian sira ne'ebé rejista ona to'o tinan 2016;

- **Orsamentu ida atu fó impulsu ba investimentu Privadu** - ne'ebé marka inísiu husi implementasaun projetu boot sira, liu husi Parseria Públiku-Privada sira.

Ita labele atende ba espetativa polítiku-partidária oi-oin hotu-hotu, nein bele konsilia hanoin oi-oin sira hotu ne'ebé manifesta ona.

Maibé, ita fiar katak versaun finál ida ne'e hatán ba saida maka ita nia Povu hein, no ba ida ne'e maka ita introdús ona melhoria signifkativa sira durante debate iha spesialidade ne'e.

Ita consegue kompromisu sira iha liña ministeriál kuaze hotu-hotu, ne'ebé tuir nafatin ita nia País no ita nia Povu nia nesidade sira.

Maske mosu dúvida barak, ami fiar katak ida ne'e hanesan pasu loloos ida ne'ebé maka País prezisa atu haree ba futuro ho fiar metin, hodi hafoun kompromisu konaba implementasaun ida ne'ebé kuidada, responsavel, efikás no efisiente, tuir prátika internasionál sira ne'ebé dí'ak liu konaba responsabilidade no transparénsia pública.

Ha'u hakarak agradese ba Exelénsia Prezidente Parlamentu Nasionál, no Senhoras no Senhores Deputadu sira hotu, ba imi nia tempu no disponibilidade atu remata prosedimentu hotu-hotu ne'ebé prezisa ba aprovasaun diploma ida ne'e nian, iha loron hirak molok Natál, hodi viabiliza ninia implementasaun iha tempu loloos iha fulan dahuluk sira Tinan Foun nian, ne'ebé besik hahú ona.

Obrigado barak ba ita boot sira nia atensaun. Ha'u hakarak kumprimenta ba ema hotu-hotu ne'ebé kontribui ona atu hadi'a diploma ida ne'e, ho konsiderasaun spesiál ba kontributu ne'ebé pozitivu tebes husi opozisaun, ne'ebé kontinua hatudu sentidu Estadu ida ne'ebé boot, hodi tau interese ita nia Povu nian aas liu duké opiniaun no ideolojia polítika nian.

Ha'u kumprimenta mós ba estrangeiru sira hotu ne'ebé hela iha ita nia Rain no ba timoroan sira, la haree ba fatin iha ne'ebé sira hela, sira moris, sira serbisu ka sira estuda, iha aldeia sira, iha suku sira, iha munisípiu sira, iha Rejiaun Administrativa Espesiál Oekusi Ambenu ka iha tasi balu, ba sira ne'ebé ha'u tranzmite mensajen ida ne'e ho domin no karinho, ho ha'u nia dezeju boas festas nian.

Períodu Natál ne'ebé besik daudaun ona, marka loron moris Kosok Oan Jesus nian, símbolu dame, armonia no simu malu nian ne'ebé loloos entre ita Ema.

Tanba ne'e, ha'u dezeja atu festa Natál nian sira ne'e atu labele sai de'it hanesan momentu fó prenda ba malu, tau árvore Natál nian ka prezépiu sira, maibé oportunidade loloos ida atu

sente espíritu Natál nian ho haksolok no esperansa foun ida iha ita nia fuan ba Timor-Leste ida ne'ebé dí'ak, justu, prósperu, modernu, dezenvolidu no ekitativu liu tán, ne'ebé ita hotu bele harii hamutuk, iha ekipa, hahú kedas husi Tinan Foun 2019 nian.

Ksolok Natál no Rahun Kmanek Tinan Foun nian ba imi hotu!
Maromak fó bensaun mai ita hotu.